

De zait

**De zait keart nea'mer um
prauch sa zan peistn ont schau nia um!**

**Ver de kinder as t schual gea'
de zait tuat nou za giatla gea'.**

**De sechen nèt de stunn as de schual rift,
lai benn as de spiln hattn se der nia ganua.**

**Ver de jungen geat se nou za pahenn,
de moa'n za hom de bèlt en de hent.**

**De moa'n za hom zait ganua za tea'òlls sèll as de bellt tea'
de varstea' nou nèt abia pahenn as de jarder gea'.**

**Ober nèt òfbe geat s òlls abia de billst,
prauch zan peistn de zait as de hèst.
Pahenn abia an himblatz geat se vir,
de sich sa kemmen ont ist schoa vir.**

**De òltn as vir hom gamòcht s sai' lem
bissn as òll mòment hòt eppes za gem.**

**As mornig lònn sa nicht mear,
de sechen as zait hòm sa koa'na mear.**

**Ont an to barst er du voursn:
-Bos hòn i gatun pet de mai' zait?-
De zait keart nea'mer um,
prauch sa zan peistn ont schau nia um!**

**De zait ist abia a vlèckl schnea,
vour as de boast bos darmit tea',
durch de vinger aus sichs sa gea',
lòs a nèt lar virpai gea'!**

S lem

**S lem ist gamòcht va tag voll va bint, tag voll va zourn
tag bou as schòfft lai der loat, van seng as pareart der za sai' en dru.**

**Ober dòra hòt s tag voll va sunn, va lait as gem der de hònt,
va pleam'bler ont liadler, tag bou de lòchst ont gearn hòst.**

**S lem ist abia a roa'nega stiag,
olomerzn völlst um, s ist glaich, stea'au ont gahi òlbe envir.**

**Stòrch sai' nèt de lait as nia umvölln,
stòrch sai' de seng as au'stea òll vòrt!**

Òlls Bersntoler!!

**Za sai' an Bersntoler hear i me stolz,
sèll as i bill s tol gip mer òlls.
Pfifferle ont brise gip mer der bòlt,
ont s holz za schirn benn as de hòn kòlt.**

**Benn as de mia pin ont bill ròstn,
vinn i òlbe an pa'm as gip mer schotn.
A vrisches bòsser vallt do nia,
s hòt s n ganua ver de lait ont ver de kia.**

**S Bersntol ist asou schea'
as pet koa' gèlt tant i vort gea'.
S ist schea' en binter pet n schnea,
en summer ont en langes benn as ist grea'.**

**Persner ont Trea'tner hom òlbe spotn ont galòcht,
benn as de hom ens gaheart klòffen de inger sproch.
De hom òlbe keing as der sai' bill ont tznicht,
de klòffen asou vavai de bissn nicht!**

**Iaz òlls en an mòment, i boas nèt en vavai,
òlla bell sa Bersntoler sai'!
Bos ist tschechen en de doing lait?
Hom sa van ins an groa'sn nait?**

**Za sai' an Bersntoler hear i me stolz,
van mai'na burzn scham i me nèt.
I gea' um de bèlt pet n kopf hoa,
van sèll as i pin hear e me vroa!**